



Wote Waweze Kuvaa

Taji

Je! Hamjui, ya kuwa wale washindanao kwa kupiga mbio, hupiga mbio wote, lakini apokeaye tuzo ni mmoja? Pigeni mbio namna hiyo, ili mpate.—1 Wakorintho 9:24.

Washindani katika michezo ya kale, baada ya kujisalimisha kwa kujinyima na nidhamu kali, bado hawakuwa na uhakika wa ushindi. Paulo aliuliza, “Je! Hamjui, ya kuwa wale washindanao kwa kupiga mbio, hupiga mbio wote, lakini apokeaye tuzo ni mmoja?” Hata kama wakimbiaji wangejitahidi kwa hamu na kwa bidii, zawadi inaweza kutolewa kwa mmoja tu. Mkono mmoja tu ndiyo ungeweza kushika shada la maua lililotamaniwa. Huenda wengine wakajitahidi sana kupata tuzo, lakini wanaponyoosha mkono ili kuipata, mwingine, mara moja mbele yao, angeweza kushika hazina iliyotamaniwa.

Hivyo sivyo ilivyo katika shindano la Kikristo. Hakuna atakayeti masharti ambaye atakatishwa tamaa mwisho wa shindano. Hakuna mtu mwenye bidii na mvumilivu atakayeshindwa kufanikiwa. Si wenye mbio washindanao katika michezo, wala si walio hodari washindao katika vita. Mtakatifu dhaifu zaidi, pamoja na mwenye nguvu zaidi, anaweza kuvaa taji ya utukufu wa milele. Wote wanaweza kushinda ambao, kwa uweza wa neema ya Mungu, wanaleta maisha yao katika upatanifu na mapenzi ya Yesu Kristo. Mazoezi, katika undani wa maisha, ya kanuni zilizowekwa katika Neno la Mungu, mara nyingi sana yanachukuliwa kuwa si muhimu—kuwa ni jambo dogo sana linalohitaji kutiliwa maanani. Lakini kwa kuzingatia suala lililo hatarini, hakuna kitu kidogo kitakachosaidia au kuzuia. Kila tendo hupimwa katika mizani ambayo huamua ushindi au kushindwa kwa maisha. Na malipo wanayopewa wale walioshinda yatalingana na juhudi na bidii waliyoifanya....

Paulo alijua kwamba vita vyake dhidi ya uovu havingeisha ilhali uzima ungalipo. Daima alitambua hitaji la kuweka ulinzi mkali juu yake mwenyewe, ili tamaa za kidunia zisiweze kushinda bidii ya kiroho. Kwa nguvu zake zote aliendelea kupambana dhidi ya mielekeo ya asili. Kila mara aliweka mbele yake lile jambo linalofaa kufikiwa, na lengo hili alijitahidi kulifikia kwa utii wa hiari kwa sheria ya Mungu. Maneno yake, matendo yake, shauku zake—vyote viliwekwa chini ya udhibiti wa Roho wa Mungu.

Lilikuwa ni kusudi hili mmoja la dhati na lisilogawanyika la kushinda shindano la mbio za uzima wa milele ambalo Paulo alitamani kuona likifunuliwa katika maisha ya wale waumini wa Korintho. Alijua kwamba ili kufikia ubora zaidi wa Kristo kwa ajili yao, walikuwa na pambano la maisha mbele yao ambalo hakungekuwa na kuachilia. Aliwasihi wajitahidi kwa kufuata sheria, siku baada ya siku kutafuta uchaji-Mungu na ubora wa kimaadili. Aliwasihi kuweka kando kila mzigo mzito na kusonga mbele hadi kufikia lengo la ukamilifu katika Kristo (The Acts of the Apostles, 313-315).

Lengo moja aliliweka daima mbele yake, na kujitahidi kwa bidii ili kulifikia—“Haki ya Mungu ipatikanayo kwa imani” (Wafilipi 3:9) (The Acts of the Apostles, 314).